



Synfocity = 810

mail us at : mzsynfo@gmail.com; mizoramsynod@gmail.com - Phone - 2314648

April 8, 2021

□ **Tripura Presbyterian Building thar hawng**

Tripura Synod building thar chu April 5, 2021 (Thawhtanni) khan Mizoram Synod Moderator Rev. Dr. C. Lalhlira'n a hawng a, Building thar lawmna inkhawmin a zui a, Rev. Bhanul Molsom, Moderator, Tripura Synod-in inkhawm a kaihuai a. Rev. Chawngmunrai, Executive Secretary, Tripura Synod-in inlawmna hun a hmang a, Upa C. Chawngthanmawia, Kolasib Diakkawn (contractor)-in Building sak report a pe.

Upa Lalrinmuana, Secretary, Mizoram Synod-in Tripura Synod building thar lawmpuina thuziak leh sum fai Rs. 2,00,000/- Tripura Synod a hlan a, Rev. Dr. C. Lalhlira leh Upa Lalrinmuana te hnen atangin thuchah ngaihthlak a ni a, Tripura Synod Choir te leh Tuidu Pastor Bial Zaipawl te an zai bawk. Inkhawm banah building thar lawmna chawhlui kilho nghal a ni.

Tripura Synod building hi a dung feet 75, a vang feet 49 niin chhawng 5 a ni a. Building estimate amount hi Rs.37,928,000/- a ni.

□ **Synod Mission Board leh ram pawn chet velna**

◆ **Orientation Training neih mek a ni**

Synod Mission Board chuan Missionary a lak thar mi 30 te tan April 7 - 30, 2021 chhung hian Synod Multipurpose Training Centre (SMTC), Mission Vengthlang-ah Orientation Training a buatsaih a, Training-naah hian Missionary hna thawk thar turten an rawngbawlina hmun an pan hmaa an hriat tur chi hrang hrang leh rawngbawlina tura thil tul leh tangkai tak tak te mi thiam hrang hrangten an zirtir a ni. Missionary lak thar te hi mipa 14 leh hmeichhia 16, an vaiin 30 an ni.

Tin, April 5 - 9, 2021 chhung khan Masihi Sangati Evangelist lak thar mi 5 te pawhin Orientation Class, Masihi Sangati Kendra, Bawngkawn-ah an nei a, subject hrang hrang an zir a ni. Masihi Sangati Evangelist lak thar te hi April 11, 2021 (Pathianni) chawhnu dar 1:30 hian Masihi Sangati Kendra Chapel, Bawngkawn-ah Tirhchhuah Inkhawm neih a ni dawn. Tirhchhuah Inkhawm hi Upa H. Thangmawizuala, BEC member-in a kaihuai ang a, Upa Lalbiakenga Fanai, Coordinator-in inhmehriattirna leh tirhchhuahte chanchin a sawi ang a, Rev. Zochhuanmawia, Masihi Sangati Kendra Director-in tirhchhuahta a nei ang a, Upa Dr. Lalnundanga, BEC member-in tanngtaisakna a nei ang. Evangelist tirhchhuahte hi mipa 4 leh hmeichhia 1 an ni a, an vaiin 5 an ni.

◆ **Zin**

April 8 - 13, 2021 chhung hian Home Mission South hmuna Mission School leh SMB hmunhma te tlawhin SMB Secretary Rev. C. Zoramawia leh Pu T. Lalchhuangliana, Supervisor of Schools te an kal.

◆ **Home Mission South**

Good Friday leh Easter Sunday vuakvetah khan mi 17 Lal Isua zui turin an inpe a, Good Friday khan Tumpanglui kohhranah Bru Baptist Church (BBC) Kohhran atangin chhungkaw 3 kan Kohhranah an inpe bawk.

◆ **Assam Mission Field**

April 1, 2021 (Ningani) zan khan mi 6 Lal Isua zui turin an inpe a, April 4, 2021 (Pathianni) khan Field chhung hmun hrang hrangah mi 6 Lal Isua zui turin an inpe.

◆ **Guwahati Mission Field**

April 2, 2021 Good Friday khan mi 3 Lal Isua zui turin an inpe.

◆ **Jharkhand Mission Field**

April 2, 2021 Good Friday khan mi 4 Lal Isua zui turin an inpe a, April 4, 2021 (Pathianni) khan mi 4 Lal Isua an inpe bawk.

◆ **Arunachal & Assam Mission Field (North)**

April 2, 2021 Good Friday khan mi 3 Lal Isua zui turin an inpe.

◆ **Nepal Mission Field**

April 2, 2021 Good Friday khan mi 1 Lal Isua zui turin an inpe a, April 3, 2021 (Inrinni) khan ringthar 9 Lal Isua zui turin an inpe bawk.

♦ **Siliguri Mission Field**

Good Friday leh Easter Sunday vuakvetah khan Field chhung hmun hrang hrangah mi 17 Lal Isua zui turin an inpe.

♦ **Arunachal & Assam Mission Field (East)**

April 3, 2021 (Inrinni) khan mi 2 Lal Isua zui turin an inpe a, April 4, 2021 (Pathianni) khan ringthar 1 Lal Isua zui turin a inpe bawk.

♦ **Odisha Mission Field**

April 4, 2021 (Pathianni) khan mi 9 Lal Isua zui turin an inpe.

♦ **Barak Area Mission Field**

April 4, 2021 (Pathianni) khan mi 3 Lal Isua zui turin an inpe.

♦ **Home Mission North**

April 4, 2021 (Pathianni) khan New Sachan (Marpara North Bial)-ah mi 2 Lal Isua zui turin an inpe.

□ **Kristian Ṭhalai Pawl (KṬP)**

Central KṬP Committee vawi 742-na chuan kum 2021 chhunga ram puma zir turin KṬP member-te mahni kutkawih ngeia eizawna an neih theihna lam a thlang.

KṬP Rorel Inkhawm 2021-ah khan thupui zir tur leh inzirtirna tura thu lut hrang hrang lo lutte chu Central KṬP Committee-in lo thlang mai rawh se tia a rel angin Central KṬP Committee chuan a ngaihtuah a. 'KṬP Member-ten mahni kutkawih ngeia eizawna an neih theih nan CKṬP-in inzirtirna nei rawh se' tih chu a thlang ta a ni.

□ **Synod Relief Fund**

Tun hnaia harsatna hrang hrang nei te hnenah Synod Relief Fund aṅging hetiang hian chhawmdawl na pek a ni.

S.No	Khua	Pek chhan	Chhungkaw zat	Pek zat
1.	Hmuifang	Damlo	1	Rs. 5,000/-
2.	Zohmun	Damlo	1	Rs. 5,000/-
3.	Bualpui 'H'	Damlo	2	Rs. 16,000/-
TOTAL				Rs. 26,000/-

March thla chhungin Synod Relief Fund aṅging harsatna hrang hrang neite hnenah chhawmdawl na Rs. 4,03,000/- sem a ni.

Tin, Synod Relief Fund hi Mizoram Synod chuan a ngai pawimawh hle a, Kum 2020 - 2021 chhung khan Synod Relief Fund atan Budget-ah Rs. 70,00,000/- a dah a, he Relief Fund hi harsatna hrang hrang neite hnenah chhawmdawl na leh ṭanpuina atan a pe ṭhin a ni.

□ **Hruaina Eng FM Radio :**

APRIL 9, 2021 (FM Zoawi - Aizawl & Lunglei @ 7:30 p.m.):

Solo : Nancy Zothanmawii - Zion khua a var dawn ta
Zaipawl : Kulikawn Bial Zaipawl - Kan ram a tidam leh ang
Thusawi : Rev. Lalzuithanga - Lalpa Isua a rinna nghah hi a thlamuanthlak a ni
Solo : B. Lalhmunsiami - Hlimna Isua
Zaipawl : Bungkawn Bial Zaipawl - Ka damlai nite.

□ **Susamachar Prasaran Programme :**

APRIL 11, 2021 (Pathianni) 5:00 pm. :

Group/Choir/Solo : Dongkamukam Pastorate Choir - Ne ningdok nei
Group/Choir/Solo : Chhinga Vengthlang - Kalvari me prabhu
Sermon : Rev. B. Zobiaktluanga - Jagat Ki Jyoti
Group/Choir/Solo : Amar Chhetri - Jaana Hai Hamko
Group/Choir/Solo : Soni Lalnunsangi - Ashantima

□ **Moderator leh Executive Secretary-te Programme:**

Rev. Dr. C. Lalhlira : Moderator

April 11, 2021 Melriat Kohhran
 April 15, 2021 OM
 April 17 & 18, 2021 Ruantlang Bial

Rev. Lianhmingthanga Sailo : Senior Executive Secretary

April 10, 2021 Pastor Quarters enfel, Reiek
April 12, 2021 Revival Sub-Committee meeting
April 14, 2021 Synod Service Board Sub-Committee meeting
April 15, 2021 OM

Rev. B. Sangthanga : Executive Secretary

April 8 - 11, 2021 Phuaibuang Kohhran Biak In hawn
April 15, 2021 OM

Rev. K. Lalrinmawia : Executive Secretary

April 11, 2021 Social Front Campaign, Serchhip
April 15, 2021 OM
April 16, 2021 MTC Governing Board meeting
Zan - Synfo programme

KTP HRIATTIRNA

Central KTP leh MSACS ṭawngkawp chuan KTP Branch-te pualin short film insiamsiak a buatsaih dawn
a. Hetiang hi a kalhmang tur a ni ang:

1. THEME

Short film thupui (theme) hi 'Mahni inhriat chian hi damna a ni' tih a ni a. Thupui behchhan hian film siamah pawh henge hi lan chhuahtir ni thei se:

- a) Nun fimkhur ṭalna leh nun vawn thianghlim pawimawhna
- b) Mahni inenfiah a, inhriatchian ngam a pawimawhna
- c) A thupuiin a tum (zirtir) a phawk chhuak tur a ni a, a hmuhdawm bawh tur a ni
- d) Ruihhlo ti lai/sex ngialngan lutuk tarlan loh nise
- e) HIV/AIDS hlauhawmzia leh kan ram dinhmun dik tak pho chhuah theih ni se

2. FILM SEI ZAWNG

Film hi Minute 20 peḷ lo ni se. Video format eng chi pawh hman theih a ni ang.

3. LAWMMAN

- a) Pakhatna Rs. 1,50,000 (nuai khat sing nga) leh memento
Pahnihna Rs. 80,000 (sing riat) leh memento
Pathumna Rs. 50,000 (sing nga) leh memento
- b) Top 10 (4-10) te hnenah Rs. 5,000 ṭheuh leh Certificate
- c) Certificate (Film intihsiaka tel zawng zawngte tan)

4. TEL THEI TUR

Branch KTP te tana intihsiakna hi buatsaih a ni a. Branch pakhat aṭangin film pakhat zel thehluh theih a ni ang.

5. FILM THEHLUH HUN

Short film hi July 30, 2021 (Zirtawpni) tlai dar 4:00 thleng theh luh theih a ni ang. Pendrive, Whatsapp leh email hmangin theh luh theih a ni a, a thehluhna tur hetiang hi a ni:

Email : shortfilmcktp@gmail.com

Pendrive : CKTP Office, Mission, Aizawlah zing dar 10:00 aṭanga tlai dar 5:00 inkar chhungin

Whatsapp : 9612215741

6. COPYRIGHT

Short Film copyright hi CKTP leh MSACS-in an nei ang a, ṭul an tih angin an thehdarh thei ang.

7. RESULT PUAN LEH LAWMMAN SEM

November 2021-ah result puangin lawmman sem a ni ang a, programme kimchang chu la inhriattir leh tur a ni ang.

PATHIAN THU ZIR DUH TAN

Presbyterian Bible School, Mission Veng-ah Certificate in Theology (C.Th) Admission hawn a ni a. Dil duhte tan a hnuai tarlan hi hriat tur a ni e.

Admission Form : Office hun chhungin Rs. 10/- a lei theih a ni
Dil hun chhung : May 26, 2021 (Nilaini) tlai dar 3:00 thleng
Dil thei chin : Class VII passed, kum 16 chin, Kohhran dan chhunga awm
Interview : May 31, 2021 (Thawhtanni) chawhma dar 10:00
Class tan hun : June 2, 2021 (Nilaini)
Zir hun chhung : June - August, 2021

Hrechiang duh tan Phone No. **0389-2317343/8201377893**-ah zawh theih a ni.

Sd/-

Rev. P.B. Zosaphara
Principal, PBS

PRESBYTERIAN HMEICHHE HOSTEL, KULIKAWN HRIATTIRNA

Pawl XI leh XII zir tur, kum 2021-2022 session atana Presbyterian Hmeichhe Hostel, Kulikawna awm duh tan April 29, 2021 tlai dar 4:00 thleng dil theih a ni a. Dilna form hi Synod Office-ah leh, Warden, Presbyterian Hmeichhe Hostel, Kulikawnah lak theih a ni e.

Interview hun : April 30, 2021 (Zirtawpni) chawhma dar 10:30
A hmun : Synod Committee Room 1

Sd/-

Rev. B. Sangthanga
Executive Secretary
I/c Hmeichhe Hostel

ADVERTISEMENT

Mizoram Christian College (MCC) Main Building Tanhril-ah sak tur a ni a. Plan & Estimate siamtu tur mamawh a ni. A duh apiangin a hnuai mi ang hian an chanchin Synod Office, Trust Department-ah Office hun chhungin ni 15.4.2021 thleng thehluh theih a ni. Plan & Estimate siamtu tur chu Synod Trust Committee-in a thlang ang.

1. Firm hming leh Address
2. Din tan ni
3. Hnathawh tawh (Works Experience)
4. Thawktu neih dan/dinhmun
5. Sawrkar-a registration certificate (Xerox copy)

Sd/-

Rev. Lianhmingthanga Sailo
Senior Executive Secretary
i/c Synod Trust